

buruz liburu bat egin duena; *Josu Oregi* jauna, aditzari buruz Euskaltzaindira txostena bidali duena; *J. L. Alvarez Enparantza* (Txillardegia, Larresoro), «Sustrai Bila»-ren egile, Euskal irakasle, idazle t. a.

Lista hau luzatu behar ote den, ala laburtu nahiz aldatu, zeuek esan.

(Horietaz gainera, Aita Iraizoz, Aita Akesolo, F. Mendizabal eta Jon Etxaide izendatu ziren.)

Donostia, 27 - 11 - 70

EUSKALTZAINDIAREN PRENSA BULEGOA

Guztiok irakurriko zenduten, noski, abenduaren 22-an egunkarietan agertu zen albistea. Euskaltzaindiak 30-ean Donostian zuela bilera, eta Larzabal jauna, euskaltzain denez gero, segurki egun hortan Donostian izango zela. Notizia ona, egun haietako egoeran, gure batzarrea periodistez inguratua ikusteko. Itxuren arabera, notizia honek gure artekoen batengandik irten behar izan du; bestela periodistek nekez jakin zezaketen hori. Mauleko batzarre ondoren ere polizia galdezka ibilli omen zan Bilboko egunkari batetan agertutako albiste okerren bat oinarri hartuta. Eta Euskaltzaindiari buruz edo Euskaltzaindikoko batzarreei, erabakiei edo lanei buruz maiz azaltzen dira prensan zehaztasun gutxiarekin egindako berriak, zeharo okertuak edo beharbada intentzio gaiztoz aldrebes jarriak ez direnean. Bistan da horrek ez digula bat ere mesederik egiten eta Euskaltzaindiaren izen ona beztu deo lañaatu egin ohi duela. Beste aldetik, guk herriari geure lanen eta eginen informazio zuzena zor diogu, baina arazo hau ezin utz diteke edozeinen eskuetan.

Beste instituzioek «oficina de prensa» edo horrelako zerbait euki ohi duten bezala, guk ere behar dugu sail hori sortu. Eta nik uste, zeregin hau edo sail hau Euskaltzainburugoaren beraren lane-

tatik bat da. Euskaltzaindiaren zuzendaritzak bere gain hartu behar duen arazoa edo egikizuna, alegia.

Beraz, hemendik aurrera gure batzarreen eta gauzen berri ematea Euskaltzainburuok beregain hartuko du. Berak idatziko du prensara bialdu behar den azalpena, eta azalpen hori egunkari eta aldizkarietara bialduko da. Era berean egunkari eta aldizkarietara eskatuko zaie bide honetatik ez datorren gauzarik gure elkarteari buruz ez dezatela onart, Euskaltzaindiaren onezkoa ez duenez gero.

Uste dut gauza honen axolari ohartuz eta bide hau hartzea txit komeni zaigula ikusiz, ontzat emango duzuela denok proposamendu hau.

Iruinean, 30-12-1970

«ANDIMA IBINAGABEITIA SARIA» EMAN ZENEKO HITZALDIA

Gaurko batzarreak ba du, ondo dakizuten bezala, zerbait berri eta berezi, zerbait aparteko, pozgarri eta guretzat ohoregarri denik. Caracas-ko «Euskera Lagunen Elkarteak» sari bat jarri zuen: «Andima Ibinagabeitia Saria». Eta Elkarte hark berak sari honen irabazle gertatu denari, Euskaltzaindiak ospez eta agerkiro saria eman dezaion eskatu digu. Euskaltzaindiak, jakina, baietz erantzun du. Pozik, ondo pozik gainera, hartuko duela saria behar bezalako ospeaz irabaztunari emateko kargua. Izan ere, gure barrutiko diren gauzetan Euskaltzaindiak ez du, ezin du bere burua gorde. Gure hizkuntza lantzen beren bizitza higatu dutenak saristatzeko eta go-raipatzeko okasiorik ezin gal lezake berak.

Sariaren irabazlea, Aita *Guillermo Larrañaga* jesuita, gertatu da.